



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tiryimyim@aolima tir yimyim TAPAK 7



Thibaut Courtois Euro 2024 nung masayatsü



Imran Khan indang cipher case nung kuli tejangja monguteter: IHC

VOL. XXI ISSUE NO. 199 (ADOK 199) DIMAPUR YANGTEPNÜ (THURSDAY) MONUPII (MAY) 02, 2024 ₹ 5.00

BJP-i tenla ki merüktetsü lemtet agiba ya tamagitsü: Advisor Imkong Imchen

Kohima, May 1, 2024 (TYO): BJP-i tenla ki telongtet merükmejutsü lemtetba ya tamagitsü lir ta Information & Public Relations and Soil & Water Conservation Advisor Imkong L Imchen-i ashi.

Old Minister's Hill, Kohima nung Advisor Imkong'er kibongi Moatsü benjung ayonga amongdang pai osangbener dang iba olen ya ashi.

"BJP-i tenla ki merüktsü tebilemba ali asübo tamasa arogo dang asüngdangtsüla. Teyari nüngdaker asü masü ta metetpelaba aser haihaura akaba sülen ang mapa tenzüksüba asü. Shinga dang asüngdangya mesüi aser temelaba magii nai ozü ki merükmeju arura na anema ozüng kübok ken o benoktsü" ta Imkong-i ashi.

"Political party ka ama nai iba ama tamagitsü lemtet ya magitsüla aser iba amai agitsü meimlar" ta paisa ashi.

"Tawa Lok Sabha election nung BJP-i metoktep aser NDPP candidate pusema nungit saka Khristantemi BJP anema kanga jembia liasü. BJP-i linük nung Khristantem dak tashiyim aser tim masüba aika inyakogo ta jembia. Iba ama tensa ka nung BJP-i temelaba magii tenla ki telungi ira ibaji tenla ki

mezüngmeshiba asütsü" ta Advisor Imkong-isa ashi.

"Central mesüra state aser district lennirtemi süang, political party kati iba ama tamagitsü lemtet yabo magisüla. Asenoki kati ka reju akhümtsübuttsüla" ta paisa ashi.

Advisor Imkong ya BJP MLA ka saka pai "Ni Naga nung ka aser Khristan ka lir" ta ashi.

"Arogo ketdangsubaren khenyongi balaka anungji iba nung teka maitsüla. Nai nübortem vote bushir aser nai votes angutsüsa meinyakra nisungtemi kodanga vote meinoktsütsü aser political party ka atema iba tangatetbaji alitsüla" ta paisa metetdaksü.

Nagaland nung tenla ki ajunga merüka lir aser BJP mesüra tanga party kechaia temelaba magii arogo ketdangsubaren alema meinyaktsüla ta Imkong-isa nenshi.

Urban Local Bodies elections agitsü osang sangdongogo aser Ao Senden tesem dena tanbo state ajungalen tiptema agitsü imlar, ta pai ashi.

ENPO-i ULB elections nung shilem magitsü lemtetba atema "policy yangluremi iba tebilemstsü koktetsü atema mapa inyaktsü imlar" ta Advisor Imkong-isa ashi.

Mizoram- Myanmar arrtsü maneni lapoktsü

Aizawl, May 1, 2024 (Agencies): Zokhawthar nung Mizoram- Myanmar border gate May 1, 2024 nungi lapoktsü ta Assam Rifles-i metetdaksüogo.

Lok Sabha election atema gate shibanga ayuba April 20 nü Assam Rifles-i lapoktsü aser idangji May 1, 2024 nungi shibangtsü osang metetdakja liasü, saka tanü parnoki gate meshibangtsüba shiogo.

Assam Rifles-i kilometre 510 talang Mizoram-Myanmar arrtsü anüker.

Hombarnü Mizoram Home Department, Assam Rifles aser tanga law enforcement agencies ketdangsurtem senden ka amendang Zokhawthar nung international border (friendship gate) meshibangtsü lemtet ta

Home department ketdangsur kati ashi.

Civilian tem aoksatsüsa mapa meinyaktsüla ta senden nung adenertemi Assam Rifles dang ashi.

Mizoram district 6-Champhai, Lawngtlai, Siaha, Serchhip, Saitual aser Hnahthial-i Myanmar den arrtsütepa lir.

Lok Sabha elections ajanga April 17 nü Indo-Myanmar arrtsü ya ghonda 48 atema shibanga liasü.

April 19 nü polling agiba sülen Indo-Myanmar friendship gate melapokba atema Mizoram aser Myanmar arrtsü anasa aliba yimdaklirtemi lungkak aita liasü.

Assam Rifles ketdangsurtemia tesüiba ama arrtsü nung Free Movement Regime dena lapoktsü metetdaksüogo.

ITLF-i May 3 nü mokdangtsü ayongzüker

Guwahati, May 1, 2024 (Agencies): Kuki-Zo nung samatsütsü mapa tenzüker küm ka ajungba bilemteta Manipur nung Indigenous Tribal Leaders Forum (ITLF)-i May 3, 2024 nung mokdang ka ayongzüker. Kuki-Zo nung tasurtem nem

akhüm tetushi agüja Kuki-Zo nung kilen shia nung wako tanak asongtsü aser shishilembadak, rejutem aser dokan ajak shibangtsü mepishir ta ITLF-i ashi.

May 3, 2024 anepdang nungi mokdang tenzüksü aser anogo piyong alitsü ta parnokisa ashi.

Lok Sabha Elections 2024 nung nisung aikati shilem agir: ECI

Guwahati, May 1, 2024 (Agencies): Tang tagidak General Elections 2024 nung India kübok tesem balala nung vote enoktsür teimbai shilem agia aradar.

Parliamentary Constituencies (PCs) 102 atema mezüngbuba shilem polling asüandang vote enoktsür 66.14% liasü. Külen, Parliamentary Constituencies (PCs) 88 nung tanabuba shilem agidang 66.71% liasü.

North East India nung Parliamentary Constituencies 25 lir aser iba nungi Constituency 21 nung polling agiogo aser Assam nung constituency 4 nung May 7, 2024 nü Phase 3 polling asütsü.

April 30, 2024 nü Congress, CPI-M aser TMC teloktemi Election Commission dang Lok Sabha election shilem ana indang final voter turnout figures osang menuba atema asüngdangba

sülen Bodbarnü ECI-i iba osang metetdaksü.

Lok Sabha election mezüngbuba shilem nung tebur 66.22% aser tetsür 66.07% shilem agiogo. Külen, third-gender voters 31.32% liasü ta ECI-i metetdaksü.

April 26 nü tanabuba shilem nung tebur 66.99% aser tetsür 66.42 shilem agi. Maneni, third-gender voters 23.86% liasü ta parnokisa ashi.

Lok Sabha elections mezüngbuba shilem nung states aser union territories 21 nung polling agia liasü aser idangji Arunachal Pradesh, Assam, Jammu and Kashmir, Lakshadweep, Manipur, Meghalaya, Nagaland, Puducherry, Tamil Nadu, Uttarakhand aser West Bengal nung tetsürtemi teimba shilem agi.

Tanabuba shilem nung states aser UTs 13 nung polling asüandang

Assam, Bihar, Jammu and Kashmir, Uttarakhand, Kerala aser West Bengal nung tetsürtemi teimba shilem agiogo ta Election Commission-isa metetdaksü.

2019 general elections den medemdangra constituency 190 nungi 153 nung voting percentage ajema liasü.

Constituency 153 nungi maximum drop (25.28 percentage points) ajitetbaji Nagaland parliamentary constituency nung liasü. Iba constituency nung 2019 küm 83% aliba nungi 2024 küm 57.72% ajema aküm.

Nagaland sülen Madhya Pradesh kübok Sidhi constituency (13 percentage points) aser Uttar Pradesh kübok Mathura constituency (11.67 percentage points) liasü.

EC-i voter turnout osang menur metetdaksüba atema Opposition party temi aitsür.

Mokokchung nung mezüngbuba 'supermart' dokan ka lapok



Mokokchung ADC & MMC Administrator Chumlamo Humtsoe-i Urban Oasis Supermart lapoktsudang tangokba noksa nung angur. (May 1, 2024 Mokokchung)

Mokokchung, 1st May (TYO): Mokokchung nübortem asoshi osang tajung ka lir aser aji kechi ta süra yimti nung mezüngbuba 'Urban Oasis Supermart' ta sür Mokokchung nung makaba dokan ka NH-2 lenmang Arkong Ward, Yongpang Market anasa Bodbarnep Mokokchung ADC & MMC Administrator, Chumlamo Humtsoe-i lapoktsüogo. Mokokchung Town Baptist Arogo pastor, Rev. Ponen Longchar-i Iba dokan meshitetsü.

Iba dokan ya liso shishilembar lanur Meyimatsung Jamir o Talimeren Tzüdir na senteper (partnership) lapok. Dimapur, Kohima ama yimti nungbo ibala mesükba 'supermart' dokan aika lapoka lir, aji oda, Mokokchung nunga nübortem jangratema aser sademsadema shishidak akatsü nüngdakba ajiteta ibai tenzüker, ta iba osangbeneri dokan kibur ana den jembidang metetdaksü.

Mokokchung ya yimti tulu masü, anungji, ibai koba tashi aotsür ashitsü makok saka onokia akokba tashi nübortem aginüba ama service tajungtiba agütsütsü merangtsü. Iba dokan nung oset ajak jenjang zülua aliba (MRP) dang nungi tajemba agütsütsü, ta dokan kiburisa shiogo.

Mokokchung nung liso shishilembar agi anünga lir, iba mapatong ya tila masü, yangi nübu, shisatsü aser rongsen jenti sentaka lir, ibai takok ngua aotsü asoshi nübortem dak tuluka keta lir, anungji, nübör nungi tenungitba aser teyari nungdaker, ta dokan kiburtemisa mepishia ayongzüker.

Nübortem khen tsüngtong arua iba dokan nung reprangdaksünür. Iba dokan tajungba aotsü atema nübortem tebilemba ashitsü register ka yutsütsü mesüra yangi staff-tem dang tebang agi ashitsü akok.

Nübortem iba dokan tajungba aotsü ashiba nung ajemdaker tarutsü nung melenshia aotsü onok tejangraba lir, ta parnokisa lemsatet.

Urban Oasis Supermart dokan nung ya chiyungtsü tapu balala, ki oset ajem nungi tenzüker tapu aika, Ice cream, shiruru chiyungtsü, electronic oset, sapon totzü aser nungdakba oset jenti angutsü aser nübör taginüba apir osettemji bener arutsü, ta dokan kiburtemisa metetdaksü.

Iba dokan ya anepdang 7:00 ako nungi aonung 8:00 ako tashi lapoktsü. Mokokchung nung iba ama dokan lapokba ya Mokokchung market otsü nung ibai tapak tasen ka asütsü aser nübör asoshi temoatsü tulu. Liso shishilembartemi iba tashi inyakba ya jangratemtsü aser iba ya ajanga meilongi süaka Mokokchung ainba mapa ka sayur.

Kohima nung Moatsü benjongmung amung



Dimapur, Monupii/May 01 (TYO): Advisor, Information & Public Relations and Soil & Water Conservation, Imkong L. Imchen-i Kohima nung May 1, 2024 nü Moatsü benjongmung yimpoksüa liasü.

Iba benjongmung ya Mangmetong Senso Telongjem Kohima ajanga ayongzük.

Sentong nung jembidang, Naga nung ya tribal society ka ama külemkejaba aser tamangba jenti liasü, saka tangbo kin shia tongtipang benjong kar dang amunger, ta Advisor Imkong L. Imchen-i ashi.

Ajisüaka asen sobaliba yimya mesamadaksüi iba amala benjongbentsü amungtsü kanga tongtipang lir, ta pai ashi.

Kohima ama yimti nung kin balala alir aser kin balalai pei kin sobaliba aser yimsüyimpong sayuba ajanga Naga nung lokti tebour ajungba ajiteter aser kati ka den temeimtep nung alir, ta ashi.

Asen sobaliba tajung yazüka ayutsü aser tarutsü putu asoshi lenmang shidak nung wazüka ayutsü asen Naga nung ajak mapa lir, ta paisa ashi.

Ao Legislators tem tenü nung jembidang Advisor, Law & Justice and Land Revenue, T.N. Mannen-i Moatsü benjong ayongzükba aser yimpoksüba atema Mangmetong Senso Telongjem Kohima aser külem tenzüker Imkong L. Imchen dang pelaba lemsatepa liasü.

Pai tanü tendak Moatsü

benjongmung indang tongmelang agi rateta ashi aser asen sobaliba nung benjongbentsü ya longzük amai lir ta ashi.

Benjongbentsü amungba ya loktiliba nung nüngdakba ka lir ta Advisor Mannen-i ashi aser asen tetsü-tebou mapang ama yimya tajung amshia telungjem asoshi inyaksü ayongzükba liasü.

Iba sentong nung telok balalai sobaliba ken aser tsüngsang agi shilem agi aser iba sülen Moatsü chiyong chiyonga liasü.

Iba sentong tenzüka Mangmetong Senso Telongjem Kohima tir N.Meren-i tarur pela agizük aser Er.Imnameren Imchen-i melepzüng o jembia liasü.

ABHWC nung inyakba staff nurses nem training agütsü

Dimapur, Monupii/May 01 (TYO): Mokochung, Mon, Longleng, Kiphire, Dimapur aser Kohima district tem nung Ayushman Bharat- Health & Wellness Center - PHC nung inyaka aliba staff nurses atema Comprehensive Primary Health Care (CPHC) kübok Expanded Packages of Services indang training ka batch ana lemsar anogo pongu-ngu National Health Mission (NHM), Department of Health & Family Welfare ajanga Jhpiego-Nagaland Team den lungjemer April 30, 2024 nü agüja liasü.

Tanüngba district nungi nurses tem asoshia ano ayongzüksü.

Iba training tenzüka sentong ya Directorate of Health & Family Welfare, Kohima nung aliba Conference Hall nung agia liasü, kong Dr.Akuo Sorhie, Mission Director, National Health ajanga iba training ayongzükba nükjidong indang lemsatepba mapang, Comprehensive Primary Health Care (CPHC) agütsütsü mechi Health and Wellness Centres (HWCs) amenoktsü ya putitet, aser iba ya ajanga preventives, promotive, curative aser rehabilitative services balala ajanga tanur-tain ajak nem akok tashi tematiba nung teyari agütsür, ta ashi.

India nung wara-shira tali

poktetba aser menatepa maoba tashidak indang tebilemstü tali akumba ajanga shiranger mezüng tashidak menaba tesem nung healthcare service tajungtiba agütsütsü kanga tongtipang akumer, ta lai ashi.

Tang aliba health facilities nung service package ya Reproductive aser Child Health nung rangloker lir. Ajisüaka Health and Wellness centres temi tang aliba RMNCH+A services dak alia memenatepba tashidak, ophthalmic, ENT, oral health, palliative and geriatric care, emergency and trauma care, mental health ailments tendangba amala tashi services agütsütsü, ta ashi.

Dimapur nung state level Disability Leadership Workshop ayongzük



Dimapur, Monupii/May 01 (TYO): Office of the State Commissioner for Persons with Disabilities, Government of Nagaland ajanga Nagaland State Disability Forum den lungjemer April 30, 2024 nü Tourist Lodge Dimapur nung state-level Disability Leadership Workshop ayongzükba liasü.

Iba workshop nung district 11 nungi matamabensai aliba nisung 44 arua shilem agia liasü.

Iba workshop ya Asst. State

Commissioner for Persons with Disabilities ajanga tarur pela agizükba o jembia tenzük aser Disability Commissioner Diethono Nakhro-i Office of the State Commissioner for Persons with Disabilities mapa aser inyakyim indang jembia liasü.

Laisa iba sentong nung shilem agirtem dang RPwD Act 2016 agi melaba sentong balala state nung ayongzükba indang lemsatepa liasü.

Lai maneni matamabensai

aliba lanurtem dang peu temeden aser mapa meteta alitsü ashi.

Nenoki education, healthcare aser employment amala nung pei temeden agir, aser kasa mapang pei teinyaksü mapa shidak inyaksüla, ta ashi.

Rupa Dutta, Assistant Professor, Department of English, Pranabananda College ajanga personality development, social etiquette tsütsü shisa lemsatepa liasü.



OFFICE OF THE LANGPANGKONG KAKETSHIR MUNGDANG

Langpangkong Students' Conference
H.Q. Chuchuyimlang - 798614, Dist. Mokochung : Nagaland
Email : Langpangkongkaketshirmungdang@gmail.com
Ref. No. LKM/GS/CON-02/2024
Date : 03/05/2024

MOLUNGNEN O

Langpangkong Kaketshir Mungdang (LKM) ajanga lenir **Wb. T. Odimatsung** (Chuchuyimlang), taoba LKM Senyur(1995-2023), Joint Director, School Education (Retd.), asüba osang angashia kanga sasar. Pa ama lenir tajung, Akhümdong LKM asoshi dang masü saka Langpangkong nung ajak asoshi khunendong aser shisatsü arangshidak longzük tajung ka iba alima toktsür aoba angashidang Tzükong sanger ajak sasaseter aser nemjemsetta bilemer.

LKM ajanga iba tako marok pai toktsür aoba mangyimer kinunger aser adianutem den lemsateper.

IMLINOK
PRESIDENT LKM
President
Langpangkong Kaketshir Mungdang



MEYITONGPANG
GENERAL SECRETARY LKM
General Secretary
Langpangkong Kaketshir Mungdang

NCERT-i Classes XI & XII atema online courses agütsür

Dimapur, Monupii/May 01 (TYO): NCERT-i SWAYAM ajanga subject areas balala nung Classes XI & XII atema cycles balala nung online courses agütsür, ta Nagaland Board of School Education ajanga NBSE kübok aliba Heads of Higher Secondary Schools ajak dang metetdaksüo.

SWAYAM (Study Webs of Active Learning for Young Aspiring Minds) ya Massive Open Online Courses (MOOCs) agütsüba sapang ka lir, koba Ministry of Education (MoE), Government of India ajanga tenzük.

Cycle 13 puba nung NCERT yagi subject 11 (Accountancy, Business Studies, Biology, Chemistry, Economics, Geography, Mathematics, Physics, Psychology, English and Sociology) nung classes XI aser XII atema online courses 28 agütsür, koba April 22, 2024 nü tenzük aser September 30,

2024 tashi alitsü.

Item courses atema enrolment ya April 15, 2024 nung lapokogo aser September 1, 2024 nü shibangtsü, ta NBSE sangdong ajanga ashi.

Item online courses yagi virtual mode nung kaketshirtem angazükba yaritsü aser ulushitsü. Content aser subject angatetsü atema tesayur aser tsürabor temia item courses nung shilem agitettsü, ta ashi.

Tali tejangjaba metetpelatsü asoshi school temi moocs.helpdesk@ciet.nic.in mesüra Interactive Voice Response System (IVRS) #8800440559 nung call asütsü akok.

Item courses nung tenüng züluoka shia aliba subjects nungi tajangzük agitsü atema school heads temi iba osang tesayur aser kaketshir ajanga dangi prokshitsüla, ta NBSE sangdong ajangasa ashi.



Directorate of Health & Family Welfare nung Director, Dr. Khriezotuo Paphino aser Assistant Food Safety Commissioner, Sendongkaba Jamir den tepila sentong ka April 30, 2024 nü IDSP Hall nung agidang tangokba noksa ka yangi angur.

ADC Tizit ajanga lenmang shibangba metetdaksür

Dimapur, May 01 (TYO): Tzünglu kanga sashia aruba mechi Pongma Bridge (alternate route via Namtola Charali Assam Lahdoigarh - Jaboka - Pentom Junction, Tizit/Mon) den atonga khen atema yanglua aliba apu raksaogo, anungji gari tulutem khen atema iba apu ajanga senzüba nokdanga atar,

Additional Deputy Commissioner Tizit, Zhoi Lohe-i sangdong ka nung ashi.

Pongma ayong nung khen atema amshiba apu ya meyanglushi tashi April 29, 2024 nü nungi tenzüka iba lenmang nung gari senzüsempong masütsü metetdaksür, ta sangdong ajangasa ashi.

Dy. CM, T.R.Zeliang-i Moatsü salem lemsatep

Dimapur, Monupii/May 01 (TYO): Deputy Chief Minister, T.R.Zeliang-i Aokin den Moatsü salem lemsatepa liasü.

Ao kin asoshi Moatsü ya tongtipang benjongmung ka lir, koba alu nung metsü yoker

pelateba benjongteper, ta ashi. Moatsü benjong ajanga telungjem, kati ka asoshi bilembe aser temeim tanüla tali asendenshitsü aser sobaliba wazüka yua Ao kin dangi yimchiyimjung arudakjangma, ta pai ashi.



May 01, 2024 nü BJP Delhi North East candidate, Manoj Tiwari-i Lok Sabha election nung tokteptsü atema nomination file asüi aodang tangokba noksa nung angur. Kasa noksa nung Union Defence Minister, Rajnath Singh-a angur.

BJP-i ST, SC aser OBC reservation magientsü: Amit Shah

Raipur, May 01 (Agencies): Parliament nung BJP MP ka danga ali nunga onoki ST, SC aser OBCs reservation agientsü memelatsü aser reservation agientsü atema onoki Congress party danga memelatsü, ta Union Home Minister, Amit Shah-i metetdaksü.

Bodhbarnü Chhattisgarh state kübok Korba constituency nung BJP candidate, Saroj Pandey atema nüboyimtsüba sentong nung jembidang Amit Shah-i, "Parnoki (Congress party) tiyazü dang proker," ta ashi.

Reservation onük nung Congress aija Shah-i, "Ato kilonser Narendra Modi-i tasembenbuba takok angutsü atema toktepdang pai reservation agientsü, ta yimjak nung maneni ola tulu agi yazü jembitsü atema Congress tasa ka lir," ta ashi.

"Parnoki kü indang video taila

ka prok. Onok sorkar menden nung küm ter liasü aser iba mapang nungji Modi-i reservation magien aser tarutsü nunga magientsü. Küm ter tsüngda mapang nung Modi-i Kashmir nung Arlla 370 agien, triple talaq agien, Ram tekülem ki yanglua meshitet aser citizenship amendment Act benok," ta Shah-i metetdaksü.

Congress lenirtem- Sonia Gandhi, Rahul, Priyanka aser Kharge nung Ayodhya nung Ram tekülem ki semzükba sentong nung adentsü atema jaoka liasü, ajisüaka parnoki magizükba ajanga ni süngmanger, ta Home Minister-isa metetdaksü.

"Congress-i minority aser vote bank samatsü tsüuba agi tekülem ki semzükba sentong nung maden. Parnok yangi aruba mapang nung nenoki parnok dang, tekülem ki semzükba sentong nungbo

maden ser nung kechiba nenoki vote ayimer? ta asüngdangang," ta Shah-i ashi.

Modi-i Arlla 370 agientsü atema jembiba mapang nung Rahul Gandhi-i, ibaji ajanga Kashmir nung azü ayong ama ayimtsü ta jembia liasü, ajisüaka tesüiba küm pongu nung longjang ka danga marong, ta pai ashi.

Ato kilonser Modi-i linük nung kiralongra samatsüogo, ta paisa shisem.

Taoba mapang Chhattisgarh Chief Minister Bhupesh Baghel-i state nung Maoists telungpurtem ajungshi aser Congress-i election nung takok angutsü atema kiralongra aser Maoists ajungshi, ta Shah-isa metetdaksü.

Shah-i, Modi tasembenbuba Ato kilonser akümba sülen küm ana tsüngda Chhattisgarh nung Maoists telungpurtem meshimeshia samatsütsü, ta ashi.

PDP-i dang Parliament nung nübur atema ola adoktetsü: Mehbooba Mufti

Srinagar, May 01 (Agencies): Bodhbarnü People's Democratic Party (PDP) tongti lenir, Mehbooba Mufti-i, Jammu & Kashmir nung aliba party tem rongnung PDP-i dang Parliament nung Kashmir nung atema ola adoktetsü, ta metetdaksü.

Laisa, tang Jammu & Kashmir nung tagidak election ya menden angutsü atema dang masü saka region nung nüburtem taginüba ola Parliament nung adoktsü atema lir, ta ashi.

Taoba mapang Jammu & Kashmir Chief Minister, Mehbooba-i, 2019 küm August 5 nü agiba telemteba agiba (Arlla 370 agienba) anema sorkar tashi nung alirtem den jembitsüla aser region nung iba temeden tim mesüi agienba kuli asüngdangtsüla, ta ashi.

Parliament ya item ama

tebilemstü onüktem metetdaksütsü aser 2019 küm nungi Jammu & Kashmir nung rongsen aser maittsü agienba atema ola adoktsü sabang ka lir, ta lai ashi.

Mehbooba Mufti-isa, timtem jenti liaka party nung inyakertemi maneni party pusema inyakba atema pelaba lemsatepba den külemi tanga party balala nung inyakertem dang iba tensa metetsü aser Parliament nung nüburtem atema longjemer ola adoktsü asoshi PDP nung adentsüla, ta ayongzük.

Osangbenertem den jembidang lai, Jammu and Kashmir indang maittsü kanga kera samadar, anungji tangar nem ambangyima inyakdaksüba nokdangtsü atema Parliament nung PDP nungi lenirtem nüngdaker, ta ashi.



May 01, 2024 nü New Delhi nung Congress lenir aser candidate, Kanhaiya Kumar-i Delhi Chief Minister Arvind Kejriwal kinungtsü, Sunita Kejriwal ajurudang tangokba noksa nung angur.

ECI-i taoba mapang Telangana CM KCR nüboyimtsü memelar

New Delhi, May 01 (Agencies): Bodhbarnü Election Commission-i taoba mapang Telangana chief minister aser BRS tongti lenir, K Chandrashekar Rao-i Congress jashidaksütsüsa tashishitsü o jembiba atema taruba ghonda 48 tashi nüboyimtsü memelar.

Election Commission-i sangdong ka ajanga, "Commission-i India temzüng nung Arlla 324 kübok aser tanga tashi amshia BRS Tir, K. Chandrashekar Rao May 1

aonung 8:00 ako nungi tenzüka ghonda 48 tashi election dak sendakba nüboyim sentongtem, lokti senden, road show, interview aser media den jembitsü memelar," ta metetdaksü.

April 5 nü Siricilla nung osangbenertem senden ka nung jembidang Rao-i, Congress lenirtem ya 'azütem jabsotem lir' ta jembia liasü.

April 6 nü Telangana Congress tatong Tir, G Niranjan-i shidi ka ajanga Election Commission dang,

April 5 nü Siricilla nung Rao-i osangbenertem senden ka nung Congress lenirtem jashidaksütsüsa tashishitsü o jembio, ta metetdakja liasü.

Iba sülen Election Commission-i Rao dang April 18, 2024 tashi nung nai jembiba o dak sendakba nung telangzüba agüjang, ta tuyua liasü.

EC-i Rao nem tekümdangtsü aiben metetdakja liasü, ajisüaka pai maneni election model code of conduct (MCC) alema inyakogo, ta metetdaksü.

Congress-i Amethi aser Raebareli atema candidate sangdongtsü

New Delhi, Monupii/May 01 (Agencies): Bodhbarnü Congress-i party, taruba ghonda 24-30 tsüngda Amethi aser Raebareli Lok Sabha menden na atema candidate sangdongtsü; party-i shinga tsüuba mali, ta metetdaksü.

Bodhbarnü Congress party headquarters nung osangbenertem den jembidang Congress General Secretary, Jairam Ramesh-i, Congress indang Central Election Committee (CEC) telemteba nung ajemdaker party Tir, Mallikarjun Kharge-i tatembangbuba telemteba agitsü aser candidates tenung sangdongtsü, ta metetdaksü.

"Taruba ghonda 24-30 tsüngda Congress Tiri telemteba agitsü aser iba osangji sangdongtsü. Ibaji masü tashibo angashiba osangtsüsang mesüra office tetuyuba osang ajakji taila dang asütsü," ta paisa metetdaksü.

Jairam Ramesh-i, "Congress Central Election Committee-i Amethi aser Rae Bareilly menden na atema candidates shimtsü asoshi party Tir nem tashi agütsüogo," ta metetdaksü.

Congress nung lenir kari Amethi aser Raebareli menden

na nung Rahul Gandhi aser Priyanka Gandhi Vadra na toktepdaksütsü akhanger.

Ano külen BJP-ia Amethi aser Raebareli atema Congress-i tang tashi candidates mesangdongba atema aitsür.

Amethi aser Raebareli na ya akhidang nungi Congress jenjang kanga junga aliba menden liasü.

Congress-i menden ana nungji Rahul Gandhi aser Priyanka Gandhi na toktepdaksütsü tsübur asü? ta osangbenertemi asüngdangba langzüdang Jairam Ramesh-i, "Temeno mali, May 3 tashi mapang lir. Onoki shinga tsüuba mali. Tang o lemtepdar aser candidates shimtsü atema Congress Tir nem tashi agütsüogo," ta metetdaksü.

2019 küm election nung Amethi nung Rahul Gandhi-i BJP lenir Smriti Irani matsüngdang tamakok ngua liasü aser taruba election nunga iba menden nung Rahul-i tokteptsü imlar.

Rahul-i Kerala kübok Wayanad menden nungia tokteper.

Amethi aser Raebareli constituencies nung May 20 nü election agitsü.



May 01, 2024 nü New Delhi nung aliba school aika bomb agi amaktsü, ta amokmerenba osang ka prokba sülen tsüraburtemi Amity International School nungi chirnurtem anizüka aodang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, MAY (MONUPII) 02, 2024

Kechiba tenla kima oksüner?

Nagaland BJP teloki tan May 11 nü state ajaklen Khristantem tekülemdak tenla kima oksütsü lemtetba ya meimlaba osang ka lir aser pelashishia agizüksü melen kechiba BJP teloki tenla kima oksüner (?) ta asüba tasüngdangba-ang tuluba arogo nunger mulungjangi aiter. Ibayongji, Nagaland Baptist Church Council aser ABAM teloki BJP telok nem parnok kübok aliba arogo tenla kitem kima mokdaksütsü asoshi arogo shi nem osang metetdaksüogo. Tenla kilonga sang mesüra kima sang, nisung kari angati nübo agi oksütsü lemtetbaji mapa tajung lir, ajisüaka BJP telok ama yimten telok kati tenla kima oka amongtsübaji, atangji, mazümazür asütsü, kechiyong NBCC sangdong nung ashiba ama, BJP teloki aniba government mapang ya Khristan-tem anema inyakba mapatem aikasa atalokdagi. India tiyong tashiji asüngdangtepa maoyonga asen kidanger Manipur nung BJP teloki yimsüsuba mapang Khristan-tem tenla ki rongdoksüba aser Assam nungbo Yisu tenung nung Tsüngrem dang taneptsü meshia sarasadem masütsü ozüng dena latetja aliba mapatem ya Khristan-tem reshikangshiba mapatem lir. Atangji, Nagaland nungbo Naga nunger BJP ajak Khristan asütsü, anungji parnoka item tatalokbatem agi temulung animesüngzükteni alitsü. Ashiko, iba ama BJP teloki yimsüsuba mapang Khristan anema tesem aika nung inyakba osang angashia Nagaland BJP purtemi Nagaland nungbo arogo den tesendaktep tajung yunüba agi tenla kima merüktetsütsü lemtet asütsü akok. Ajisüaka, asen among adena orrbo BJP government alidak state-tem nung tenla ki rongdoksür, sarasademtsü songtemer, Yisu temeim indang sayutsüngitsüa nokdang aser tamangba yimsü melenshitsü memelar ta asüba kasa teloki asen lima nungbo tenla kima merükteta amongtsübaji mapeter, iba jagi NBCC aser ABAM teloktemi nokdang asütsü. Atangji, ibai Nagaland BJP lenirtemi mebilemdangi inyakba mapa ka lir. Nagaland BJP telok yabo Khristan yimsü anemba purtem masü saka BJP telok nükjidongbo India lima ya Hindu lima ka akümtsü nükjidong lir. Ibaji Nagaland nung alirtemi mamangra, BJP telok akümertem aser BJP National nung tongti lenirtem dang asüngdangra hau asütsü. Ibaji miima inyakba sentong ka masü saka Hindu nunger teimba aliba lima ka Hindu nunger lima akümtsü merangba mapa ka lir. Iba jagiang ato kilonseri dena kanga temulung agüja Ram tenla ki renema meshitetogo. Aji oda, Nagaland nung alir BJP purtemi BJP telok tentetertem mangdang aser nükjidongji bushia angatetsü merangra, atangji, BJP nükjidongji India nung Khristantem tenla ki merüka ayutsü atemabo masüa ta angatetsü. Meyiper, Khristan tenla ki merüka inyaktsübajiang BJP telok tangatetba anema asütsü akok. Aji oda, Naga nunger shiba koba yimten telok nung tendir denaka, pei adenba yimten telok tangatetba aser nükjidong tama angateta yur külenang adentsüla. Yimten telok koba südir sang, nübortem asoshi tajung inyaktsü nükjidong nung akümba teloktem lir, anungji tenla ki aser kima merüktetsübajibo arogo nem yutsüdi aser yimten teloki inyaktsüba mapabo tenla kima adena orr mapa inyaker meinyakma lir, item nungdaktemji reprangteta inyakra nübortem iba telok nung asangtsü. Atangji, Nagaland BJP telok asoshiho Nagaland nung inyaktsüba mapatem dang nungibo Nagaland adena orr BJP government alidak Khristan purtem tetsübu tia nung lia lira, itemji linük temzüng nung aliba ama pei amangnüsü amangtsü aser sayunüsü sayuteta pei lima nung shitakba senso küma sademsadema litetsüsa tensa mapang yanglutsütsübajiang teinyaktsü mapa tongtibang lir. Atangji, linük nung BJP telok aser BJP government-i Khristan yimsü anema inyak tashibo Nagaland nung BJP telok ya mapetsü. Ibaji Nagaland BJP lenirtem asoshi khuret tuluka lir. Aji oda, oagi India-len BJP teloki Khristan yimsü anem manenra, Nagaland BJP purtem asoshiho BJP toktsütsü asü (?) mesüra Khristan yimsü-ang toktsütsü ta bilemdangtsüsa mapangang ka arutsü ana nung lir.

OLEMSABANG

Tanü Aor tamang kechi jenjang nung lir ?

~ L.Kika Pongener.

(Yashi adok nungi...)

Atangji, asen madak yimsusurtemi o agi jembiba aser mapa inyakba medemdanga reprangdangra khenyongi meputep, yongji nuburtemi parnok dak tamang mekateter. Anungji tangar kintem-jibo koda sunur sudakjang...Saka asen Ao kini danga tasü-ita ochimashi aser tashiyim mapa anema ola adoktsüba sernung, küm-150 sua amanga arur tamanger memesuki sepla-sepshiba ya angudang kanga-sa sungmanger...!!! Ao kin-ji Naga nunger kin ajunga madak tesayur kin ka ama mapang kabo lia aruogo. Lenla ajunga nung Samanir kin ka ama lia aruogo. Naga nunger kintem rongnung teimba ka aseni tamang yimsu nung aser shisaliok nung tenuk lapoktsüogo. Tanüa asen Naga lima ajanger Arunachal lima, Assam lenden lima aser bendanger (Foreign) lima tashi oa tenyaba (Mission) mapa tulu inyakdagi. Aji oda, item kintem jagi asen Ao kin dak nungi tajung imlar. Surabangla, Ao kini sen tashi aser alima tashi sulen anidaka sayutsü asü...??? Mesura Yisu sulen anidaka sayutsü...??? Tenyar Paul-i Korint nunger dangi züluba..."Saka ni tangar dang sayutsüngir külen ni kü sasa magizükalir ta ser ni kü mang nung azüoker aser iba lar akümer" (1 Korint-9:27). Anungji, asen Ao kin dak nungi aseni sayua anitetba kintemi tatishitsü tajung agitsüsa o agi masü saka mapa agi inyaka sayutsüla.

Tanü asen lima nung sorkar inyakyim agi nubur mulung masüba, rongsen ketdangsuba nung ochimashi (Corruption) aser terenlok mapa (Development) shitak meinyakba asenok tenuk agi angur. Tanü India nung Khristan-tem aser kin tilatem lendongpang nung nokdaka lir. Asüngji India nung tamangertem aser kin tilatem koda lia aotsü aji nuklai arudang kanga-sa tsüremseta bilemer. Anungji iba ama tensa nung, talisa, Ao kini tamangertemi koda shilem agia inyaker...??? Aor arogo aser mungdangi anir iba tongpang rara nung tasü-ita tongti shilem agia raratsüla. Khristan yimsu aser Khristan-tem reshikangshiba anema Ao kini anir tasü-ita raratsüla. Aor kin-ji Naga nunger ajunga nukrangdong lir. Aor arogo aser mungdangji Naga nunger ajak asoshi 'Tanü dangtsü' (Looking Glass) amai lir. Anungji asen lima sorkar nungi tenzüker loktiliba ajak nung achimashi mapatem metongshia yanglushiba nung Aor arogo aser mungdangi yakpang sur inyaktsüla. Tsüngen tetsüdi-lai sayip-sayipi jaja sayuba agi techanu ajak iba tsüngsu nungji anidaka jajaba ama, Aor arogo aser mungdangi inyakyim ajak nung ochishia inyaka mesayura, tanga tanüngba kintem ajunga iba tsüngsu nungji anidaktsü. Tsüngremi alima nubur ajak dang nungi Israel kin balaka shimtetba ama, Ao kin Naga nunger ajak dang nungi balaka shimtet. Surabangla, iba amaji asenoki mapa agi inyaka aser liteta sayuteter asü mesayuteter...??? Anungji Aor arogo aser mungdangji alima dang ochi aser shitak inyaka sayuba sabang ka sudi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Comedian aser actor Russell Brand baptiogo



May 01, 2024: Comedian aser actor, Russell Brand-i pa Amongnü (April 28) Thames ayong nung baptiba osang lemsatep.

Pai social media ajanga, "Yashi ni baptiogo, aser ibaji jangratemtsüka liasü. Lenla aika nung ni balaka ajangshi. Ochiji- tesüiba mapang nung temesepba mozü balala achir kati mengutetba chichiba tesünep ni nguogo. Baptiba mapang nung ni balaka ajangshi aser ibaji jangratemtsüka liasü," ta metetdaksü.

Paisa, pa Thames ayong nung bapti, ta metetdaksü.

Thames ayong ya Southern England nung lir.

"Ni langka tasen nguteter ama bilemer. Iba ya ni asoshi tasen, ni angazükdar saka tangbo iba ya kü lenmang kümogo. Ni moatsüogo, anisüngzük nguogo aser tzüratemogo, ta ni bilemer," ta pai ashi.

"Ni Khrista nem bendanga agütsüba atema kanga pelar," ta paisa shisem.

Taoba Hokolbarnü Russel Brand-i, baptibaji süadoktsü aser tanaben asotsü atema maongka, ta ni amanger, ta metetdakja liasü.

Paisa, "Tesüiba toktsüsü aser Galatia nung shia aliba ama Khrista tenüing nung tanaben asotsü maongka," ta lemsatepa liasü.

Tesüiba ita aika Russell Brand-i Khristan yimsü kanga jangraba lemsatepa liasü. Yaküm December ita nunga pai C.S. Lewis-i züluba 'The Problem of Pain' aser Rick Warren-i züluba 'The Purpose-Driven Life' kaket densema pai Khristan kaket aika zünga liasü, aser item kaket azüingba ajanga pai Tsüingrem den tesendaktep yanglutsüji tongtibang, ta ratet.

Taküm March ita nunga pai denomination balala indang Tenla ki aika semdang aser Khristantem dang baptiba indang asüingdanga liasü.

Yaküm interview ka nung jembidang pai, "Teimla mangur aikati nüngdakba ama ni-a tanela nüngdaker. Ni Tsüingrem nüngdaker, mesüra iba lima den ni melitetsü," ta metetdakja liasü.

Nisung meyrjang aikati Mandisa Hudley nem akhüm agütsü

April 29, 2024: Honibarnü (April 27) Tennessee nung aliba Brentwood Baptist Church nung osangtajung kentener, asür Mandisa Hudley nem akhüm tetushi agütsüba memorial service nung nisung meyrjang aika aden.

Osangtajung kentener arrshi küm 47, Mandisa anogo ishika tejaklen Nashville nung aliba lar kidang süadok.

Memorial sentong nung jembidang Mandisa'er kinünger, Dennie Marshall-i, "Mandisa-i la takümüji ken ama ali. La anojungi asüba mapang nungi tenzüka nenoki temeim sayuba atema ni densema lar kinünger ajak tenüing nung ni nenok ajak dang pelaba lemsateper," ta metetdaksü.

YouTube nunga memorial sentongji live sayu aser nisung

11,000 dak temai iba sentong repranga liasü.

Memorial sentong nung lar kinüngertem aser medemertemi la bilemteta jembi, Laishiba azüing, Tsüingrem O jembi aser tamalen Fisk University nung azüingdang Fisk Jubilee Singers nung züingsemtemi ken aten. Mandisa-a college azüingdang Fisk Jubilee Singers nung züingsem liasü.

ANOGO ABEN TSÜNGREM DEN

Nü Kuo Agüjang

Yisu kangki nung asütsü anasa tetsür ka tenüing agi Mari-i, sen aika alangba teronem menemba toztü pa tetsüing nung mezütsü. Ano kanga tasü tait mapa kaji la ku agi Yisu tetsüing aitoktsü (tk 3). Mari-i taküm tepiyong bendenba rongsen Yisu nem agütsüba dang masü la merah ket Yisu nem agütsü. Küm noklang züing mezüingbuba mapang anüdoklen aliba tetzürtemi lokdi senden aser kima yimtong nung ku alenba mesala. Tetsüri lokdi nung kolang salabaji merah maket aser merüka maliba temaitsü ta züingshi. Saka Mari-i Yisu mechi nung la maksü arem. Yisu külemtsü asoshi Mari-i tangar matsüingdang merah meketi akümütsü mulunga liasü.

Tamanger aikati tekülemi aodang pa mesüra la tangar nem tajungtiba ngudaktsütsü meranger. Pei akaba süoshi tajungtiba agir. Arogo koba nung nübortem tanela nung tashi ita alitsü asoshi pei temenen ajak Tsüingrem dang ashitsü akokber iba arogoji tashi tait ta ashitsü kok.

Tekülem yimya nung kecha tai mali ta bilemba aser inyakba ibajia tai lir. Tsüingrem aser nisung den shitak albia ibaji chichiba tekülem lir. Nisung tsüingda aküm keta sayunü dang pei temenen miima ayubaji tai tulutiba lir.

Tazüingtsü Lai : Yohan 12:1-8

Mari-i sen jenti alangba teronem menemba toztü seret tesadang bener arua Yisu tetsüing nung mezütsü, aser pei kulang agi pa tetsüing aidoktsü. - Yohan 12:3.

Pastor Jacobs-i soseta asübaji tai, saka pa kodak nung lir: Jim Putnam



Pastor Gene Jacobs



Pastor Jim Putnam

May 01, 2024: April 22 nü Pastor Gene Jacobs asüba sülen Amongnü (April 28) Pinehurst, Idaho nung aliba Real Life Ministries Silver Valley Arogoi tang mezüing tekülem sentong agiogo.

April 22 nü arrshi küm 59, pastor Gene Jacobs samaba sülen kasa aonungji ketdangsertemi pa tasüming angu.

Pa asüba kuli tang tashi bushisüingdangdar, ajisüaka ketdangsertemi, pa asüba atema nisung shinga dak-a melung malemstü mali, kechiyong pastor Jacobs-i pasasa khaseta

asüba ama onoki bushitetogo, ta metetdaksü.

Pa tasüming anguba sülen Silver Valley Arogoi sarasadema pa atema mangyima aruba sülen taoba Amongnü mezüing tekülem sentong agiogo.

Tekülem sentong nung Tsüingrem O jembidang Real Life Ministries tentetsang, Jim Putnam-i, tang ama mapang ka nung Khrista teyari medenibo tejashi tuluba dang akümütsü, ta ashi.

Pastor Putnam-isa, "Jacobs-i atangji pasasa asü asünungbo ibajibo tai, aser telemtetba tai

agibaji mojing nungi lir. Ajisüaka peisasa soseta asürtembo molumi-i aotsü ta tesayuba agütsübaji Laishiba tesayuba masü. Tang pa kodak nung lir," ta ashi.

"Gene-i pai jembiba ama inyak aser pai Laishiba nung shia aliba ama Yisu indang jembiba ajakji shidak dang. Nisungtemi tamakok angutsüa akok aser aibelentsüa akok. Meimchir kaji pei teshisadangba ajanga kokdaktsütsüa akok. Nisungtemi pei melungjang nung bilembatemji khenkhenbo tai asütsüa akok," ta paisa ashi.

Pastor Putnam-isa,

"Nisungtem atema ni alima nung maliba tajungba asütsüa akok, ta Gene-i bilem asütsüa akok. Ni kü khuret tangar den melemsateptsüla, kechiyong tangar-a peipei yari khuret lir, ta pai bilem südi. Item tiyazü ajakji satan nungi lir. Asenok ama chichiba tamangertemia tsükchir olaji angaba sülen telemtetba tai agütsüa akok. Ajisüaka Gene tang Kibuba Yisu den külemi lir," ta ashi.

Putnam-isa, "Pastor (Gene)-i aibelenogo, ta sür pai tamalen jembiba otem mesüra pai inyakba ajakji tai, ta asenoki mezüingshitsüla. Tsüingremi iba tesem (Tenla kidang) nung Gene amshioigo aser pa ajanga asenok ajak taküm nung temelenshi kaogo. Asenoki Tsüingrem O nungi mepilatsü," ta ayongzük.

Paisa, "Laishiba zülurtemia parnoki taküm nung timtem ajangshiba, ochishia aliba aser temelung atemba ajangshiba lemsatepogo. Ibaji ajanga meimchirtemi pei tangatetba kija nung metaloker alitsü makok, ta kuli sayur," ta metetdaksü.

Pastor Jacobs ya ochishir ka liasü, ajisüaka pai pa khuret tangar den melemsatep, kechiyong Arogo nung külem tenzükertemi pa timtembaji

memeteti liasü, ta pai ashi.

"Khistantem tesendaktep nung pei tebilemba saboka ochishia jembitsüji nüngdak. Ibaji ajanga dang asen khuret abenba nung yariteptsü atema tangar nem temelaba agütsütsü," ta paisa shisem.

April 22 nikongdang 4:00 ako nung Real Life Ministries Silver Valley-i pastor Gene Jacobs samaba osang sangdonga liasü aser kasa aonungjisa pa tasüming anguba osang metetdaksü.

2007 küm Real Life Ministries Silver Valley Arogo tenzüka mapang nungi pa Arogo nung tongti pastor liasü. Western Washington nungi Jacobs-i tamalen U.S. Navy nunga tenzüka liasü aser Boise Bible College nung azüing.

Tamalen Arogoi sangdong ka ajanga, "Nisungtemi Yisu den tesendaktep tajung ayuba nung Gene-i jangratem angu aser Tsüingrem taochi ajanga nisung ajak, kibong aser tesendaktep ajak tanaben tajungba kümdaktsütsü ta pai amang. Gene-i pa azünga aliba mapang nung par kibong züingsemtem den among, guitar atem aser North Idaho nung tetsüing agi mesüra bicycle amshia senzütsü jangraa liasü," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngküm

(n) au tapu balala (bamboo)
& Süngküm lu ayimertem tayokdak maka akoksadagi.

Süngküp

(n) Süngdong meyibangba teküp (bark of tree)
* Süngküp kar agibo chiyongsü yanglur.

OLONG PAITEP # 6774

	1				2	3			
4			5						6
						7			
	8								
	9			10				11	
						12			13
14									
						15			

TIPLÉN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6773 TELANGZÜBA

TIPLÉN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak,
- 9. Zünga, 10. Temopu,
- 12. Walu, 14. Ali.

NAI-A YA METETTER MA

JAKE PAUL - MIKE TYSON



Nüngtugu boxer Mike Tyson-i July 20, 2024 nü professional boxing ring nung Jake Paul den tsüngteptsü sentong tuluka renema lir.

Mike Tyson ya "youngest world heavyweight champion" lir aser pai iba otsü ya November 1986 nung yangluteta liasü. Pa arishi küm 20 asü dang Trevor Berbick madak takok ngua WBC heavyweight takok korang nguteta liasü.

Taküm July 20 nung Mike Tyson-i tsüngtepba sülen longest professional career (world heavyweight champion) otsü tasen ka yanglutsü.

Manipur nung police subotsü agir senzür nisung 11 apu



Imphal, April 30, 2024

(Agencies): April 30 anepdang Manipur nung security forces-i nisung 11 police subotsü agir lia apu.

Mahar Regiment sepaitemi parnok ket nung AK rifles, INSAS rifles, SLRs, hand grenades aser bulletproof jackets ngutetogo.

Ajisiaka, iba mapang tetsür telok kati sepaitem noktang aser nisung 11 ket nungi ngutetba prangpong-injangtem rakzüksü merang.

Lenmang nung

tenokdangbatem ajuruaka Manipur Police aser Indian Army teloktemi Kumbi Police Station tashi prangpong-injangtem bener ao aser tensa aziokteta liasü.

Sepaitemi apurtem ya April 27, 2024 nü Naranseina nung CRPF sepai ana khasetba den sendaktepa lir ta olulutem jembir.

Ajisiuaka bushisüngdanga arudang tatalokba ana sendakteptsüsa kuli kecha nguteta mali.

Sepaitemisa Manipur Zalenkot, kübok

Churachandpur aser Mantripukhri Bazar, Imphal East district nung lendong atalokba tesemtem nung mita aodang prangpong-injangtem aika ngutetogo.

April 29 nü sepaitemi KCP (Lamyamba Khuman) züngsem Wangkhem Premjit apu aser pa ket nungi 9mm pistol ka ngutetogo.

Security tsütsü tayongzükba aika ajuruaka sepaitemi NH-37 aser NH-2 nung khu abenba garitem timtem melii senzütsüsa mapa inyaka arudar.

Tripura sorkar mapa inyaker 22-i MCC alema inyak

Guwahati, May 1, 2024

(Agencies): Election Commission of India (ECI)-i model code of conduct (MCC) alema inyaker nisung 27 tashi mapa nungi anentsüogo.

Tripura nung Chief Electoral

Officer Puneet Agarwal-i ashiba agi state sorkar mapa inyaker parnok 27-i MCC alema inyaksangshiba atema temerenshi agütsüogo.

CEO Agarwal-isa department tekolakpurtem dang pei pei department nung mapa

inyakertem dak disciplinary action agütsü tetuyuba agütsüogo.

Department kati ECI dang nungi temelaba meshir ang mapa inyaker dak nungi 'temporary suspension' agientsü akok ta paisa ashi.

Karimganj nung presiding officer-i BJP nem vote enoktsüba atema anentsü

Guwahati, May 1, 2024

(Agencies): Karimganj Lok Sabha constituency nung district election officer (DEO)-i presiding officer ka mapa nungi anentsüogo.

Iba presiding officer yagi polling station nung Bharatiya Janata Party (BJP) candidate ka atema votes aiben enoktsü.

Election nung tim masüba inyakba video ka kanga prokshiba sülen Karimganj Lok Sabha constituency DEO-i presiding officer mapa nungi anentsü.

April 26 nü constituency

nung polling masü dang "mock poll" alidang video ji agiba liasü ta tanga osang ka ajanga angazüker.

Iba tatalokba atema bushisüngdang ka asüba sülen DEO-i presiding officer Nazrul Haque Tapadar mapa nungi anentsü.

Presiding officer Tapadar-i nisungtem polling booth telungi mobile phones bener aitba menokdangba atema pa mapa nungi anentsü.

Independent candidate Abdul Hameed atema polling agent Abdul Sahid-i aiben BJP

candidate aser MP Kripanath Mallah indang button nung aiben anemba video nung sayua lir.

Polling agent temi mock polls mapang candidate tem atema test votes telatet ka enoktsütsü temelaba agütsür. Ajisiuaka iba tatalokba atema bushisüngdang südar aser tanga polling agents nungia osangtem agitepdar, ta DEO-i ashi.

Iba tatalokba nung tai tonglokja aliba polling ktdangsurtem nem show cause notices agütsüogo, ta paisa ashi.



Mizoram police-i April 30, 2024 nü gelatin sticks 8,000 aser detonators 1,500 apuba sülen agiba noksa ka angur. Hnahthial police-i Mongulbarnep maxi cab ka soter mita repringdang tapoktsütem bena aliba angu aser iba dak sendakba nung nisung 2 apu. Gari driver ji Sangau town nung alir H. Ramropuia (24) ta jangaago aser tapoktsütem ya Myanmar-i bener aotsüba liasü ta Mizoram Police-i ashi.

Indonesia nung volcano pokteta adok; Nisung meyirejang aika anienogo

Jakarta, Monupii/May 1 (Agencies): Indonesia nung Mount Ruang pokteta adokba sülen mitsü anüngleni km 5 shi khateta yokba sülen nisung meyirejang aika aninba den tayimtsü senzüsenpong minpronga liasü.

Ketdangürtemi ashiba agi, Mongolbarnü North Sulawesi province nung volcano ya asemen tashi pokteta adok, aser volcano ajanga long aser lava amala pokteta yokba tzüyim nung tsüka tsunami arutsü akok ta tsüba bilemer.

Indonesia indang disaster mitigation agency (BNPB)-i lemsatepba video ka nung long aser lava pokteta adokba den Ruang indang crater tekolak nung tzüngi aiba sayuogo.

Agency-i ashiba agi, volcano pokteta aliba asetkong Ruang nung alir nisung 843 ajak province yimtiba Manado-i aninogo, koba km 100 shi pilar lir. Kasa mapang nung kidanger asetkong Tagulandang aser Siau nungia rong ajanga nisung 12,000 shi aninogo.

Imran Khan indang cipher case nung kuli tejangja monguteter: IHC

Islamabad, Monupii/May 01 (Agencies): Cipher case nung temelenshi tasen ka adoka, tang tepuokdak alisang taoba ato kilonser Imran Khan-i confidential diplomatic cable ayuba aser pa ket nung lia samba atema Federal Investigation Agency ajanga bushisüngdangtsü mali, ta Islamabad High Court ajanga ashi.

Arishi küm 71 tain Khan aser pa ato kilonser inyakba mapang foreign minister inyaka alisang Shah Mehmood Qureshi nati cipher case nung tena aiba jembishitsü mepishiba ama Chief Justice Aamer Farooq aser Justice Miangul Hassan Aurang-zeb nung aliba Islamabad High Court (IHC) ajanga Mongulbarnü nungi tenzüka iba ken o tanaben kakteta jembir aser tepuokdak alisang taoba ato kilonseri cipher yua liasü ta prosecuting agency ajanga kuli ngutetba record ali-mali ta asüngdanga liasü.

Islamabad nung rally ka alidang Pakistan Tehreek-e-Insaf telok tentetsang Khan-i diplomatic cipher indang copy ka ta nübürtem dang kaket ka sayuba mechi pa den taoba foreign minister Shah Mahmood Qureshi küm ter tepuokdak ayutsü obendang agüja lir. Iba kaket ya par sorkar atsüngdoktsü asoshi bendangeri tasa yangluba kuli lir ta Khan-i tai tonglokja liasü.

2022 küm April ita no-confidence vote ka ajanga PTI sorkar atsüngdoktsü hopta ana dang lia Khan-i cipher paper ya ayiptena sayua liasü. (Maneni tapak 8 nung...)

Indonesia indang sangdonger aliba seven-meteorological agency kilometre exclusion zone tema (BMKG)-i Bodhbar anepdang nung dang alitsü atema map ka lemsatepogo aser iba nübürtem nem osang agütsüogo, ajanga volcano nungi pokteta ta ashi.

Indonesia nung mapangshia menoknok aser volcano pokteta adokba lendong ajangshi, kechiyong iba asetkong ya Pacific "Ring of Fire" nung amenoka lir, kong tectonic plates aika ajuruteper.

Mount Ruang nung April ita tetenzüklena volcano ishíben adokogo aser iba mapanga nübürtem aninba den tayimtsü senzüsenpong nung kongshia liasü aser tsunami arutsü akok ta tsübutepa liasü.

2018 küm Java aser Sumatra asetkong na tsüngda Mount Anak Krakatoa indang crater shilem ka chirepba sülen volcano nungi adokba long aser lava aika tzüyimi-i ai aser iba ajanga tsunami adokdakja nisung 400 dak tema asü aser nisung meyirejang aika yirua liasü.

Mount Ruang monitoring post tekolakba Julius Ramopolii-i, Bodhbar anepdanga volcano nungi maneni mitsü aser mokozü adoka liasü, ta ashi.

Paisa, lendong ano mesüshi aser ketdangürtemi liasü.

OFFICE OF THE SOYIM GAZETTED OFFICERS' ASSOCIATION
 HQ.: UNGMA, MOKOKCHUNG, NAGALAND

TENÜNGSANG AGÜTSÜR

Nisung pezüi UPSC CSE 2023 tatidang nung takok ngua ranks balala tongtetba atema SGOA ajanga tenüngsang agütsür:

- Ms. Tolino Chishi - AIR 431
- Ms. Alemyim Isaac Solo - AIR 749
- Ms. Imsurenla Longkumer - AIR 774
- Mr. Chubalemba B. Chang - AIR- 915

Parnoki dangar dak alia asen region nung aliba nübürtem maneni tenzüksü aser parnok tsüngsü nung lanur tali jajatsü ajungmesotsü imlar.

Ano maneni association nung züngsem, Imsurenla Longkumer D/o Er. Tongtiliba Longkumer & Chubasangla Anar (Retired IAS) nem alakteta tenüngsang agütsür, shibai UPSC CSE 2023 (AIR - 774) takok ngutet. Lai takok anguba atema onok tejak tenteter aser ozü züngsem dang temeim aser teyari agütsüba atema kija, lokti tentet ajunga dang pelaba metetdaksür.

Takok angur ajak tarutsü anogotem jenjang tajungba nung pei wadang nung nokdaksü aser mulamoshia moatsütsü Tsüngrem dang sarasademtsür.

Sd/- (DR RONGSEN LONGKUMER) President, SGOA **Sd/- (YASHIKALA JAMIR) Secretary, SGOA**

ALI AYOKTSÜ LIR **Vihokhu village 5 puras ; Rs 50 per sq. ft. 1 minute from highway Contact : 8974869756**

ANGO CHANU AYOKER

Kolkata nungi ango chanu tapu balala - common carp, grass carp, catla aser merika temeyoktep oxygen densema kg 1 nung Rs. 800 aser magor 1 nung Rs. 5 agi May 2 nungi Kohima Road anasa Aolijen sector, Ungma nung angutsü; talinertemi tsünglanglen agüja aliba Contact No. nung tongteprateptsü akok. K. Lanu Lkr 8787650064 / 9862747886

China nung highway ka anenzüka ao, nisung 24 asü

Beijing, Monupii/May 01 (Agencies): China south Bodhbarnep 2:10 ako meta tsütsü Guangdong province anenzüka alu.

Iba mapang gari 20 shi taolen mali akum aser yangji nisung 54 liasü, ta Xinhua ajanga ashir.

Anepdang 3:00 ako tashinung nisung 24 asüba jangjaogo aser ano nisung 30 mozü kidang temang anepalutar.

Iba lenmang yanglushiba maparen tenzükogo aser mozüki nung alirtem tajungba lir ta ashi. State broadcaster CCTV ajanga anünglen nungi

OFFICE OF THE CHANGTONGYA SENSO TELONGJEM
 DIMAPUR: NAGALAND
 Motto: Telongjem Aser Teyaritep

KONANG TETUSHI AGÜTSÜR



NBSE ajanga agiba HSLC Examination 2024 nung Wb.Moatoshi Longkumer aser Wt. N. Tainla Jamir na jala **Kr.lmkongsenla Longkumer**-i Top 17 jenjang nguteta yimtsür-yimer nem takok aser tenüng tajung bener arutsüba asoshi Changtongya Senso Telongjem Dimapur (CSTD) Dimapur Changtongya Tsur Telongjem (DCTT) aser Changtongya Kaketshir Telongjem Dimapur (CKTD) ajanga konang tetushi agütsür.


Maneni Union ajanga HSLC aser HSSLC tatidang nung takok angur ajunga nem tenüngsang agütsür aser tarutsü nung nenok wadang nung takokba lidakjang ta maneni sarasademtsür.

Sd/- President, CSTD **Sd/- President, DCTT** **Sd/- President, CKTD**


OFFICE OF THE MERANGKONG KAKETSHIR TELONGJEM
 P.O. TULI, B.P.O. MERANGKONG - 798618
 DIST. MOKOKCHUNG : NAGALAND.

TENÜNGSANG AGÜTSÜR


Tsünglanglen agüja alirtemi takok tulu ngutetba atema Merangkong Kaketshir Telongjem ajanga tenüngsang agütsür. Parnoki takok anguba aser yimtsür-yimer nem konang-nüngsang bener arutsüba asoshi tushir.



BENJUNGAKUM JAMIR
 S/o. Mr. Meyidangit & Mrs. Moanaro
 Top 9th Position, HSLC
 Total Marks - 581
 Percentage - 96.83%
 Institution - Don Bosco School, Tuli



TIARENLA LONGKUMER
 D/o. Mr & Mrs Moanungba Longkumer
 Top 14 Position, HSLC
 Total marks - 581
 Percentage - 96.83%
 Institution - St John's School Kohima



IMKONGSUNGIT JAMIR
 S/o. Mr.I.Korachiba Jamir & Mrs P.Imtikala
 Top 17th Position, HSLC
 Total marks - 574
 Percentage - 95.67%
 Institution - Fernwood School, Kohima

Maneni HSLC aser HSSLC Examination 2024 nung takok angur kaketshir ajunga nem Union ajanga tenüngsang agütsür. Nenok ajak tarutsü wadang nunga takokba lidakjangma. Tsüngremi nenok ajak moajang.

Sd/- (SHILUTEMJEN) President, MKT **Sd/- (RONGSENJUNGLA) Gen. Secy. MKT**

lenmang nung shilem ka tangokba noksa ka prokshiba Parnok ya public security, nunga kari teraksa aika ongken emergency response, tarok ka nung nangtena liasü. firefighting aser mining rescue department tem nungi lir.

Anü madokdang tangokba video tem social media nung T z ü n g s a n g - m o p u n g prokshiba nunga iba ongken majungba ajanga tawa nungi mi aser mokozü adoka Guangdong nung iba ama liasü. Guandong nung iba ama lendong aika ataloka arur.

CCTV-i tzünglu tesashi Iba province nung taoba ita maneni aruba ajanga alimar tzünglu kanga sashia aruba yimya nung iba lendong ya ajanga tzümetsüng adoka atalok ta ashi. nisung pezü asü aser nisung 100,000 dak tema pei ki yutsür ainshitsüsa akum.

Lenmang ya metre 18 (59-foot) jungnüa anenzüka ao ta ashir. Rescue operation nung Taoba hopta Guangzhou yariteptsü atema ketdangüri yimti nunga tornado ka arua nisung 500 shi yoka liasü. nisung pongu takum sama.



Olympic Gold Quest (OGQ) kübok National Rifle Association of India-i ayongzüka Assam Rifle & Shooting Association-i achaayaanga agiba Rifle aser Pistol atema NRAI National Coaches Course nung Kohima District Rifle Shooting Association nungi Visasiellie Suho, Aries Rifle and Pistol Shooting Academy, KIC, Dimapur nungi M.Tiatemjen Jamir, Aries Rifle and Pistol Shooting Academy, KIC, Dimapur nungi Kimatsung Jamir nungeri shilem agiogo. Iba Course ya April 24 nungi 30 tashi agia liasü.

Champions League: Munich aser Madrid na goal kasasa nung tembang

Monupii/May 1, 2024 (Agencies): Mongolbarnü Champions League semi-final mezüngbuba leg nung asaya tatem penalty ka idaktsüba densema goal ka idakja Real Madrid forward Vinicius Jr-i pa asaya yimya tajung sayuogo aser Bayern Munich den iba asaya ya goal 2-2 nung tembanga liasü.

Brazil nunger asayar yagi Real Madrid atema mezüngbuba goal minute 24buba nung idakja pai season asembuba atonga CL semifinal nung goal idaktsüogo.

Ajisüaka asaya tanabuba shilem nung Bayern Munich puria minute pezü tsünga goal ana idaktsü, saka Vinicius-i kanga dang tongtibang penalty

ka idaktsüba sülen asaya goal kasasa nung tembang. CL semifinal nung team ana tsünga otsüsüsüsa tang agi tibenbuba asayar aser Mongolbarnü Bayern puri kanga junga asaya tenzük aser minute 15 tsünga parnoki goal idaktsüsü atema maongka aika ngua liasü. Parnok rongnungi Leroy Sane aser Harry Kane nati Real pur amokmerena liasü.

Bayern-i asaya amokbanger asayaka Real puri goal idaktsüsü asoshi maongka ka anguba melalu aser Toni Kroos-i Bayern pur defence adena ball tajung ka agütsüba sülen Vinicius Jr-i goal keeper Manuel Neuer adena goal metsüoktsü.

Asaya nung minute 51buba nung Kross-ia ball tajung ka

metsüoktsü saka Neuer-i kanga junga kümzüka liasü. Ajisüaka minute ana dang lir Bayern atema Sane-i mezüngbuba goal idaktsü.

Iba sülen minute 57buba nung Lucas Vazquez-i, Jamal Musiala alangdaktsüba atema Bayern nem penalty ka agütsü, koba Kane-i idakja parnok tejakdang aküm.

Telok ana tsünga maneni toktepa asaya arur, minute 83buba nung Vinicius-i penalty ka ajanga Real atema tanabuba goal idakja goal kasasa nung asaya tembang.

Team ana tanabuba leg asayaba sülen shirnoki kokdir parnok Borussia Dortmund mesüra Paris St Germain den asayatsü.

Australia team March lenisüba nung T20 World Cup asayatsü



Monupii/May 1, 2024 (Agencies): Taruba ita asayatsü aliba ICC Men's Twenty20 World Cup 2024 nung Australia team Mitch Marsh lenisüba nung asayatsü. Ajisüaka taoba mapang captain Steve Smith bo team nung züngoksema mali.

Marsh, shiba hamstring yirur anepaluba mapang ka lir, pa lenisüba nung team asayatsü ta Bodhbarnü jangjatsüogo. Aaron Finch taoba küm asaya nungi anenba sülen captain mapa ya melentepa bena aruogo.

June 2 nü nungi tenzüka United States aser Caribbean nung asayatsü aliba WC atema

meshimba tetezü Smith 2012 küm nungi limited-overs formats World Cup nung asaya aruba tang mezüngbuba masayatsü.

Arishi küm 34 tain Smith, US nung Major League Cricket tanabuba season nung Washington Freedom nung asayatsü nangzüktepogo. Iba asayamung ya T20 World Cup tembangaba sülen anogo pezü lir July 4 nü nungi asaya tenzüksü.

Indian Premier League (IPL) nung kanga junga asaya-a strike rate 233.33 ajungba sülen Fraser-McGurk team nung züngoksemtsü atema asadanga liasü. Ajisüaka WC amala asayamung ka nung Travis Head mesüra asayar tejen David Warner melentsü atemabo teperi masü asü.

Allrounder Marsh number asembuba aser Glenn Maxwell pezübuba nung batting amentsü imlar aser Tim David finisher ama ponglanglen asayatsü akok.

Matt Wade aser Josh Inglis na wicketkeeper ama shimogo aser Adam Zampa nem teyari

agütsüsü atema spinner Ashton Agar shimogo.

Kasa mapang nung pace bowler tem rongnung teti ama Pat Cummins, Mitchell Starc aser Josh Hazlewood nunger densema lir aser parnok nem Nathan Ellis aser all rounder Cameron Green, Marsh aser Marcus Stoinis nungeri teyari agütsüsü.

2021 T20 World Cup champions ya taküm mezüngbuba asaya June 5 nü Oman den Barbados nung asayatsü.

Australia team ya ICC World Test Championship aser 50-over World Cup defending champions lir.

T20 World Cup atema Australia team:

David Warner, Travis Head, Mitchell Marsh (captain), Glenn Maxwell, Tim David, Marcus Stoinis, Matthew Wade, Mitchell Starc, Pat Cummins, Adam Zampa, Josh Hazlewood, Josh Inglis, Ashton Agar, Cameron Green, aser Nathan Ellis.

Madrid Open: Rafael Nadal Jiri Lehecka-i tsükdaktsüogo

Monupii/May 1, 2024 (Agencies): Madrid Open nung Mongolbarnü round of 16 nung Jiri Lehecka-i tsükdaktsüba sülen Rafael Nadal iba asayamung nung tatembangbuba asayaogo.

Arishi küm 37 asayar shibai Grand Slam 22 aser Madrid Open ponguben koker lir, pa 7-5, 6-4 agi Czech nunger asayar Lehecka-i tsükdakja liasü.

"Ni kanga pelar. Iba hopta ya kanga dang jangrademtsüka liasü. Ni iba court nung ano khen asayatsü atema maongka anguba atema pelar," ta Nadal-i ashi.

Nadal tang asaya aliba season nung koda asaya nungi anentsü aji telemtetba agia mali, saka taoba mapang world No 1 asayar ya asaya nungi anentsü anasabai arudar.

Nadal yiruba ajanga küm ana tashi junga masayateti arudar aser pa iba ita asayatsü aliba Roland Garros nunga asayatsü masayatsü mejangja.

Lehecka, tang agi taananbenbuba Masters 1000 quarter-final-i iogo aser pai

ashiba agi, iba asaya nung Nadal akokba ya tejashitsüka aser tepelatsüka lir.

Tebur kija asaya nungsa Carlos Alcaraz-i 6-3, 6-7 (5/7), 7-6 (7/4) agi Jan-Lennard Struff koka quarterfinal-i iogo.

Maneni top-seeded asayar Jannik Sinner-ia, Karen Khachanov 5-7, 6-3, 6-3 agi koka taküm Masters 1000 quarter-final pezübuba tongtetogo.

Pa Australia Open tesüsabuba koker alisang Felix Auger-Aliassime den asayatsü shibai Casper Ruud 6-4, 7-5 agi kokogo.

Tanga asaya ka nung Daniil Medvedev-ia 7-6 (7/3), 6-4 agi Alexander Bublik kokogo aser pa Masters 1000 quarter-finals ajak tongtetogo.

Tetsür asaya nung Iga Swiatek-i 4-6, 6-0, 6-2 agi Brazil tsür Beatriz Haddad Maia kokogo, aser la küm anabuba atonga Madrid semi-final tongogo.

Tetsür kija asaya nungsa Keys-i 2022 champion Ons Jabeur 0-6, 7-5, 6-1 agi kokogo.

BENDANGLI OSANG : Tapak 7 nungi...

Imran Khan indang cipher case nung...

Iba kaket lemshiba indang foreign ministry report tejangja defence counsel Barrister Salman Safdar-i IHC nem agütsüba nung taoba army chief aser chief justice densema cipher agizüker ajaki Khan anema ken o zülüokba sülen iba confidential document ya meyipa agütsü ta shia liasü.

Special prosecutor Hamid Ali Shah-i iba kaket foreign ministry nungi PM Office tashi belenshiba indang rateta ashidang Justice Farooq-i "Principal secretary ajanga iba kaket ato kilonser nem amoktsüba indang kuli ali mali?" ta asünga aser iba mapang principal secretary inyaka lisang Azam Khan-i iba kaket PTI tentetsang nem amoktsü aser kodanga meyipa magütsü ta court matsünga kuli agütsüogo, ta Shah-i langzüa liasü.

"Ibai olulu dang südi ta amanger, kechiaser Khan-i secretary dang iba kaket meyipa agütsüsü shir alitsü," ta chief justice-i ashi.

Ajisüaka taoba ato kilonser-

i iba kaket ngur alitsü aser iba nung ajemdaker pai yimjak nung jemi aser US dangi mera kar yoka alitsü südi ta angatetsüsa kuli lir, ta Shah-i ashi.

"Saka komasür iba kaket meyipa magütsü ta asenoki metettsü?" ta chief justice-i asünga.

Khan-i iba confidential document kodanga meyipa magütsü ta ken o nung kuli agütsürtemi shiogo, ta Shah-i langzü.

Yimjak nung jembidang aser private television channel den sensaksema mapang Khan-i iba kaket ya pa ket nung lir ta nangzük, ta pai ashi. Yimten yimsüsür temi nüburtem temulung atsür arutsü mechi iba ama o jembir, ta Justice Aurangzeb-i ashi.

Pai state counsel dang temelaba makai Azam Khan apuba atema First Information Report zülüokba nung kechi asü, iba indang court nem angatdaksütsü ashi aser iba FIR nung challan mesüra discharge report ka May 2 tashinung agütsüsü tuyu.

BILEMDANGANG

"Pei kechi langa ali iba yari temaotsü angur."